


PS(DUP)



**NESENEL DE**

**PAPUA NU GINI WOK WANTAIM**

Papua Nu Gini i wokim nupela haus bilong em nau. Tasol ol kamda ol i kalap nogut long painim ol binatang bilong kai-kai haus i wokim rot i go antap long wanpela pos. Ol kamda i pamim haus na i glasim gut ol-geta diwai.

Ol binatang hia em i liklik lain nating bilong Moresby tasol. Na Moresby em i wanpela pos tasol bilong haus.

Yupela ol kamda, yupela memba bilong Haus, yupela lusim Moresby. Go nabaut long olgeta taun na skul na haus sik na lotu na kampani. Lukim ol ami na ol plis na ol tisa na ol dokta na ol minista na ol komiti na ol kiap. Ol man-meri bilong Papua na Nu Gini wantaim i wok, i skul, i pilai, i lotu.

Lukim: kiap bilong Rabaul na Morobe em i wanpela Papua. Lukim John Poe na Toni Ila. Tupela i Papua, tasol ol Nu Gini i votim ol memba bilong Raikos na Lae.

Ol memba bilong Haus, yupela i belgut. Yupela no wari. Long dispela Nesenel De, kantri bai soim yupela diwai bilong haus i strong.



Man bilong Papua, Mista Leo Warupi bilong Kairuku Lokal Gavman Kaunsil i sekan wantaim man bilong Nu Gini: Mista Thomas Kavali, em i minista bilong ol wok long dispela taim ol i pinisim nupela bris long Wara Aroa long nupela Hiritano Haiwe i helpim ol Papua i longwe liklik long Port Moresby. Kain pasin sekan olsem, pasin wok wantaim, pasin pren - em i helpim yumi.

**Haus Asembli makim tripela minista**

*Haus Asembli i bin orait long makim 3-pela nupela minista. Em hia:*

Mista John Kaputin (Rabaul Open)

*- minista bilong jastis na ol wok long kot*

Mista Pita Lus (Maprik Open)

*- minista bilong ol plis, kalsa, wok turis*

Mista Yano Belo (Kagua-Erave Open)

*- minista bilong ol wok*

**PAINIM INSAIT LONG NIUSPEPA:**

Air Niugini em i wanem samting .....	9
Nesenel Yut Muvmen i wanem samting ..	10
Konstitusenel Plening Komiti i tok ..	15
Nesenel De poto pes .....	17
Fantom - komik buk .....	18
Nupela resis bilong winim mani .....	20

**Baset Toktok**

Minista bilong ol beng, Mista Julius Chan, i bin autim ol toktok bilong baset.

Baset em i min yumi kisim we ol mani bilong ranim gavman na gavman bai tilim i go long husat long dispela yia 1973/1974.

Lukim pes 6 na bai yu ken painim dispela tok save na lukim em i kisim yu tu o nogat.



Sapos yu gat tok, yu raitim sotpela tasol. Sapos yu raitim longpela, bai mipela i sotim. Yu mas raitim nem bilong yu tru long olgeta pas i kam long mipela. Sapos yu no laik mipela i prinim nem bilong yu tru, orait yu raitim wanpela narapela nem bilong yu.

## MISIN NO WOK BISNIS

Dia Edita.- Mi laik bekim wanpela pas bilong Samuel Domoae bilong Vanimo.

Mi bin ritim Wantok niuspepa bilong 18 Julai. Yu bekim tok bilong Otto Suarke bilong Kamaliki long Isten Hailans Distrik. Yu bin tok bai Otto i tingting na painim wanem misin i save wokim planti bisnis na i no luk olsem misin.

Yes Samuel mi ting olsem Katolik Misin i save wok bisnis tasol. Yu save hamas pipel ol katolik i stap long Papua Nu Gini.

Na long ol dispela pipel hamas mani bai misin i lusim bilong helpim ol? Long wokim skul bilong helpim ol pikinini, haus sik bilong helpim ol sik manmeri haus lotu bilong helpim sol bilong ol. Na hamas man na meri nau misin i bin helpim ol long skul na nau ol i wok wantaim gavman?

Sapos yu go long Rabaul bai yu lukim haus sik bilong katolik misin i pulap long sik pipel long ol kain kain lotu, na tu long Gels Haiskul na Tisa Koles, na tu ol nes ol i no katolik meri tasol. Na sapos i no gat mani bai olsem wanem misin i ken helpim ol dispela pipel i stap long haus sik. Olgeta samting bilong lotu i save kostim moa mani tu. Olsem tu long gavman i painim mani tu bilong helpim kantri Matyu sapta (7) seven bilong yumi Papua Nu

Gini i kamap gut.

Nau tingting pastaim na bihain yu mekim dispela kain toktok na maski wari tumas long misin painim mani.

Giselle Waire,  
Moem Bareks/ESD.



## LUKIM LONG BUK BAIBEL

Dia Edita.- Mi laik prinim wanpela tok bilong mi i go long Wantok Niuspepa.

Em nau wari bilong mi: Mi save ritim Wantok na mi save painim ol sampela man i save tok bilas long meri i putim sotpela sket.

Na tu long ol yangpela man o meri long pasin bilong ol i save dres.

Na tu ol man na meri i save lukim ol sampela lain i save dres long ol kain kain dres na ol i save tok bilas long ol.

Na mi ting em i no stret bilong wanem, long gutnius long Baibel em Matyu sapta (7) seven lain (1) wan i go inap

lain (3) tri God i tok, olsem yu i no ken jasim ol sampela man, bai bihain God tu bai i jasim yu.

Na tu God bai i jasim yu long wan kain lo em yu jasim ol man o meri long em.

Na em tasol mi gat long ol sampela man i save tok bilas o jasim ol arapela brata na sussa bilong yumi.

Luke Faru,  
Madang Tisa Koles.

## MASKI LONG GIAMAN NEM

Dia Edita.- Mi wanpela skul manki bilong Y.C. long Goroka.

I no stret long wanpela man bilong Mt. Hagen i go daun long ples nambis olsem Lae, Madang na ol narapela hap na i mekim trabel na em i tok mi bilong Chimbu. Dispela tasol mi i gat bikpela wari tru long en. Sapos dispela bilong Mt. Hagen hia i trabel em i mas tok stret olsem mi bilong Mt. Hagen. Em i no ken giaman tasol na i tok mi bilong Chimbu o Goroka.

Planti ol dispela ol man olsem i save givim nem nogut long ol man bilong Chimbu.

Em i no gutpela pasin tru bilong giamanim nating wanpela man olsem mi bilong Chimbu. Sapos yu bilong Chimbu yu mas tok stret. Yu no ken giaman olsem yu bilong Mt. Hagen. Oltaim planti man i save giaman tasol long wanem ol i pret long kolim nem bilong ples bilong ol stret.

Em tasol liklik wari bilong mi.

Mr. K. Solomon,  
Y.C. Senta/Goroka.

## YU NO PRET LONG PLISMAN


Dia Edita.- Mi kaunim Wantok Niuspepa na mi lukim wanpela hap tok na mi tingting planti long dispela tok dispela em wanpela studen bilong yunivesiti i bin raitim.

Long Wantok namba 70 bilong mun Jun insait long pes 3, Mista Camillus Narokobi i toktok long ol plis. Mi laik tok olsem yumi mas i no ken pret nating. Nogut tru. Maski plisman i putim unifom na pes drai na wokabout insait long taun o wanem hap.

Tasol yumi manmeri i mas save olsem em i raun long mekim wok bilong em. Na tu em i raun long kisim ol trabel man o bungim wanem ol trabel man long rot, insait long taun eria na bringim ol i go long kot. Nogut long yu lukim ol plisman olsem na yu pret nating long ol.

Sapos yu pret ol plis olsem maski yu i no ken raun, stap tasol long haus bilong yu.

Olgeta manmeri i mas klia gut long as bilong wok bilong ol plis na



pasin bilong ol tu. Yu i no ken pret nating na ranawe i go. Yu i ken stap na bai plis i ken helpim yu long wanem kain wari bilong yu.

Em tasol bekim bilong mi.

Kamandong Kanai,  
Banz/W.H.D.

## YU NO KEN SEKSEK

Dia Edita.- Hia mi laik bekim pas bilong George Kalkal long Hawaii.

Mi bin ritim long Trinde, namba 18 de bilong Julai. Poroman ya i tok olsem yu gat wari long ol man i save marit long ol meri longweples tasol bihain taim meri i gat pikinini bai man i rausim na marit long narapela meri gen.

As bilong trabel i olsem: Pastaim long man i maritim dispela meri i no save skelim pasin bilong meri. Em i lukim smatpela pes na seksek long em na i maritim em.

Na bihain em i lukim pasin bilong em i no stret na i rausim na em i kisim nupela meri. Ol poroman skelim gut pasin bilong meri na yu maritim em. Yu no ken seksek long gutpela naispela dres bilong em na yu pundaun long em.

Ating yu wanpela wel dok raun painim olsem hap kaikai long olgeta paia long olgeta hap.

Dominic Areng,  
Hawaii/E.S.D.

## BIKMAN YU HARIM GUT

Dia Edita.- Nau mi laik bekim tok bilong Memba Haus Asembli Anton Parao.

Yes bikman mi bin ritim wanpela hap tok bilong yu long Wantok Niuspepa. Na long dispela hap tok bilong yu



i mekim tok sem na wari tu. Em i olsem yu bin tok bilas long ol man na meri bilong nambis.

Wanem bikpela hevi o wari i stap namel long ol pipel bilong Hailans na long ol pipel bilong nambis i givim bel hevi long yu na yu bin mekim dispela kain tok?

Mi ting olsem ating yu gat liklik sik malaria long het bilong yu, olsem na yu raitim dispela kranki tingting bilong yu.

Yes Anton Parao, bilong wanem yu no laik raitim sampela gutpela Nius yu kisim long Haus Asembli na putim i go long Wantok Nius orait wanem man i save ritim Wantok Niuspela i ken ritim gutpela tingting bilong yu bikman?

Sori Anton Parao mi wok long Hailans na mi no bin harim o ritim wanpela tok bilas olsem long ol pipel bilong Nambis long Hailans tu. Mi bin wok planti yia long Nipa Sura Kampani long hap bilong Saten Hailans na mi no bin harim kain tok bilas olsem bipo. Nogat tru.

Ol man long Hailans i laikim ol man bilong Nambis long givim han long ol long wok bisnis. Olsem na yu wanpela liklik manki bilong asde tasol i mekim kain tok bilas olsem.

Yes bikman Parao yu

## TU MINIT TINGTING

LITIMAPIM NEM BILONG GOD.....

"God! Yu God bilong glori. Taim yu kam bek long maunten yu olsem King: Long wanem: yu bin winim ol birua long pait."

Sam 76:4.

Dispela Sam em i tenkyu long God long em i helpim ol Israel na ol i winim birua bilong ol.

Man i raitim dispela Sam em i amamas long biknem bilong God. Biknem bilong em i go inap olgeta hap. Strong bilong em i brukim spia na hap plang bilong ami bilong ol birua. I no inap wanpela man i sanap na pait wantaim strongpela God bilong Israel. Sampela ol i traim, tasol tok bilong God i pinisim ol.

Yes, nau; tu planti man ol i bikhet yet. Ol i no ting long ol i mas aninit long strong bilong God. Mipela yet inap. Samting mipela i tingim na mipela i laik mekim, orait mipela i mekim tasol.

I tru, nau long dispela taim sampela man i mekim bikpela wok. Long faktori ol i wokim balus i ken spit tru na i go antap tru. Na sampela ol i wokim bikpela, bikpela sip i karim planti kago moa. Na sampela ol i wokim bikpela roket i ken lusim dispela graun olgeta na i go pundaun long mun.

Tru, dispela olgeta i bikpela wok. Tasol God yet i as bilong ol dispela olgeta save na wok. Yumi mas litimapim nem bilong em.

Dispela naispela tingting i kam long wanpela naispela buk ol i kolim WOKABAUT WANTAIM JISAS. Pasto Yanadabing APO i edita, na Kristen Buk Senta, Madang i save salim. I gut yu kisim wanpela.

tok olsem sapos ol Hailans man i kam bai ol sindaun gut na wokim wok bilong ol long Distrik bilong ol. Mi no ting dispela em i tru. Ating yu giaman tasol. Mi i stap long Saten Hailans tasol mi lukim planti pait i stap long Mt. Hagen ol man bilong ples i pait long meri, i olsem pait long han nogat; ol i pait long naip, tamiok, na spia, na kilim indai planti man olsem pik na dok.

Bilong wanem yu no putim dispela ol bikpela hevi long hap bilong yu long Haus Asembli o long ol niuspela na long ol redio?

Sule Bakoe,  
Nipa/S.H.D.

### TOKSAVE:

Ol rida bilong Wantok i mas harim gut. Taim yu laik raitim pas yu mas prinim gut nem bilong yu. Nogut mipela prinim kranki.



## TRAUSEL GIAMAN



Ol i stori long mun i olsem: Wanpela man i kisim trausel. Em i pasim tupela han na lek bilong em long rop. Em i no tingting long kaikai, nogat. Em i putim i stap long limbum.

Long wanpela de tupela i go wasim saksak. Tupela pikinini tasol i stap long haus. Pikinini man em i krai moa yet.

Susa bilong em i tok: "Yu laikim pis?" Em i tok: "Nogat." Em i askim gen: "Yu laikim saksak na banana?" Em i tok: "Mi no laik."

Bilong wanem, em i no laikim long arapela kaikai. Em i lukim pinis trausel bilong papa. Orait, susa bilong em i les pinis.

Olsem na em givim trausel long brata bilong em. Em i kukim long paia pinis. Tasol taim rop i bruk, trausel i lusim paia. Em i kalap i go long graun. Em i goap long buai pastaim. Bihain em i kalap i go gen long kokonas. Na em i sutim wanpela ai bilong mun long supsup. Olsem na mun i gat wanpela ai tasol i lait.

Tasol kokonas em i surik i go antap moa yet. Tupela i tingting planti, na i tok: "Bai mitupela mekim wanem nau long senisim dispela trausel? Mitupela mas kisim wanpela sel bilong kokonas bai i kamap olsem trausel gen, bai putim gen long limbum."

Tupela i go wasim saksak bilong kaikai wantaim dispela trausel. Papamama bilong tupela i kamap long apinun. Papa i kam malolo pinis. Em i tingting gen long dispela trausel bilong em na em i laik kukim.

Dispela sel bilong kokonas i kamap olsem trausel tru. Tasol em i sel bilong kokonas tasol.

Papa i tingting planti, na em i tok: "Em i no trausel tru, em sel bilong kokonas tasol. Trausel tru bilong mi, i stap we?"

Pikinini meri i tok: "Em asua bilong liklik brata, em i krai krai planti tumas. Olsem na mi givim em. Em i goap i go antap pinis long kokonas."

Papa i tok: "Bilong wanem yutupela i mekim olsem?" Em i tok: "Mitupela i hat nating long was-

im saksak."

Na em paitim tupela nogut tru. Em i tokim tupela: "Bihain bihain yutupela i no ken mekim olsem moa. I mas i pinis nau."

Inikio Sosmekul.

## Tudak I Kam We ?

Bipo tru i no tudak olsem nau. Em i san tasol.

Wanpela de wanpela man nem bilong em Hiki wokim wanpela nupela gaden bilong em. Taim em i katim gaden pinis, em i go long ples bilong em, na dispela masalai meri nem bilong em Hekep i kam na planim ol diwai gen. Olgeta taim masalai meri i mekim olsem tasol i go.

Wanpela taim dispela man bilong gaden em i belhat nogut tru. Man hia tok: Husat i bagarapim gaden bilong mi? Man hia belhat nogut tru.

Wanpela taim Hiki i katim gaden pinis na em

i was i stap wantaim spia bilong em. Taim Hiki i was i stap em i harim bikpela nois i kamap namel long nupela gaden bilong em. Na Hiki i surik i go klostu long gaden bilong em, na em sutim masalai meri long spia.

Taim em i sutim masalai meri, bikpela tudak i karamapim em. Hiki i longlong nogut tru, na em i go antap long diwai na em i slip. Taim em i slip em i harim kakaruk i krai na em kirap sindaun i go tulait.

Nau i tudak, tulait. Bipo tru i san tasol.

Jacob Hakon,  
P.H.D./Wewak.



### BETEN BILONG MEKIM BIPO LONG PLAK


O God Papa skulim mipela gut long save, laikim na adorim yu long olgeta taim. Helpim mipela tu long i stap gut oltaim, long dispela plak bilong yumi.

Na helpim mipela tu long bihainim ol lo na rul olsem gutpela Kristen, bai kantri bilong mipela i mas i stap olsem Kristen Kantri.

Na ol pipel insait long em i mas wok wantaim, sindaun gut, na kantri bilong yumi Papua Nu Gini bai i kamap na i go het hariap. Amen.

Laurentius Wamron.

# OLGETA HARIM GUT!



Dispela sop pauda, ol i kolim "COLD POWER" i nambawan tru. Em i wasim na rausim tru ol kainkain pipia long ol klos bilong yu.

Dispela sop pauda i gat wanpela kain strongpela marasin long en i save mekim save tru long rausim ol kain pipia – long ol klos.

Yu ken usim wara long tang or long wara nating. Dispela i kol wara. Sop "COLD POWER" i strong moa na i ken rausim ol pipia long klos bilong yu.

# BASET - MANI KAM NA MANI GO

Long Tunde nait, de namba 28 bilong Ogas, long 8 klok Mista Julius Chan, minista bilong fainans o ol beng na mani, i bin telimautim baset bilong dispela yia long ol memba bilong Haus Asembli. Em i bin toktok moa olsem wan aua. Baset em i min hamas mani bai dispela kantri i kisim long dispela yia na hamas mani bai em i lusim long olkain wok.

Namba wan samting Mista Chan i tenkyu long ol Australia, long wanem gavman bilong ol i givim gen 214 milion dola long Papua Nu Gini bilong helpim em i go het. Australia yet i laik yumi mas tilim dispela mani olsem:

Bilong statim nupela beng bilong PNG,	\$17,000,000
Bilong statim nupela lain balus .....	1,200,000
Bilong ples balus bilong Moresby .....	1,600,000
Bilong ol rot, bris, lektrik .....	52,000,000
Bilong baim wok bilong ol Australia .	66,000,000
Ol haus na ofis em i lusim i stap....	35,000,000

Mista Chan i tok bai Papua Nu Gini i lusim 304 milion dola long olkain wok em i laik mekim.

Ol bai tilimaut olsem tasol:

Pablik woks program .....	\$35,000,000
Helpim ol wok fama na wok didiman ...	3,300,000
Bilong edukesen: ol skul na tisa ....	28,700,000
Bilong helpim wok plisman .....	10,000,000
Bilong ol arapela kain wok gavman ...	127,500,000



Mista Julius Chan

*Mista Chan i gat kros long ol lokal bisnisman i winim moa olsem \$5000. long yia na ol i trikim gavman na no baim takis long en. Em i no stret.*

*Em i tok tu bai yumi gat nupela mani long Papua Nu Gini; tasol em i no ken kamap bipo long Desemba 1974. Na bai mani hia i gat strong inap long mani bilong Australia.*

Em hia liklik aidia bilong soim mani bilong pablik woks program i go long husat:

Bilong wok ensinia (rot, bris, lektrik):

Westen Hailans Distrik .....	\$ 4,600,000
Sentral Distrik .....	4,500,000
Morobe Distrik .....	2,500,000

Bilong wokim kain kain haus na ofis:

Sentral Distrik .....	\$ 3,100,000
Westen Hailans Distrik .....	1,700,000
Saten Hailans Distrik .....	423,000
Is Sepik Distrik .....	249,000
Madang Distrik .....	223,000
Manus Distrik .....	155,000

Bilong wokim ol haus sik:

Sentral Distrik .....	712,000
-----------------------	---------

Bilong wokim ol nupela skul:

Sentral Distrik .....	199,000
-----------------------	---------

Bilong helpim wok plisman:

Westen Hailans Distrik .....	562,000
Sentral Distrik .....	495,000
Wes Nu Briten Distrik .....	160,000

*Em i wok bilong gavman bilong painim mani inap long dispela \$304,000,000 em i mas lusim.*

*Gavman bai kisim long Australia .... \$77,000,000*

*Gavman bai winim long olkain nupela*

*takis long sigaret, tabak, bia,*

*wiski, laisens, loliwara. Na em i*

*apim takis bilong olgeta man i*

*kisim moa olsem \$5000 pe long yia..109,000,000*

*Gavman bai kisim dinau inap long..... 54,000,000*

Mista Chan i tok kantri bilong yumi go het gut na ol bisnis bilong en tu.

..... Kopi, kopra na kakao na ti bai winim inap long \$71,700,000 long dispela yia. Em i gutpela taim bilong ol dispela samting. Ol arapela kantri i no gat planti. Olsem prais i antap moa.

..... Long dispela yia bai yumi gat 130,000 bulmakau long Papua Nu Gini. Ol inap planti mani.

..... Ol Japan i wokim nupela faktori bilong wokim tin pis na tripela bilong wok timba. Ol bai winim moa mani long kantri.

..... Bougainville Kopa i go het gut na long dispela yia bai em i winim \$182,000,000.

..... Bai yumi gat nupela lain balus bilong gavman stret, nupela ealain ol i kolim Air Niugini bilong senisim TAA na Ansett.

**'PROLAC'**  
TRADE MARK

**Marasin bilong olkain man meri pikinini i mas kisim strong.**

**'PROLAC'**  
TRADE MARK

## Stori Bilong Tok Pisin (5)

### RABAU LONG STORI BI- LONG TOK PISIN

Orait, nau yumi skruim stori i go. Bihain ol misinari talatala na katolik i kam long hap bilong Rabaul long Jemantaim yet, planti nupela plantesen i kamap long dispela hap. Tasol ol Tolai bilong hap bilong Rabaul ol i no wok long ol plantesen.

Ol hetman bilong ol plantesen i salim ol sip i go baim boi long hap bilong Buka na bilong Sepik. Long sampela yia inap 20,000 nupela wokboi i kam. Na ol tu

i bilong kain kain tok ples, long wanem long Papua Nu Gini yumi gat 700 kain kain tok ples.

### TOK BOI

Orait, ol dispela boi i laik toktok wantaim ol boi i no wantok. Tok pisin i kam insait na wantu olgeta wokboi i lainim kwiktaim tumas. Long dispela taim yet tok pisin i gat nem tok boi tasol.

### TOLAI

Ol bikpela plantesen i stap long hap bilong ol Tolai na olsem planti tok bilong ol i kam insait long nupela tok

boi. Em hia sampela: ki-bung, malolo, longlong, purpur, marimari, pit-pit, tanget, tambu, birua, tambaran, marila.

### JEMAN


Ol samting hia yumi bin toktok long en, i kamap long Jemantaim yet. Na ol Jeman tu i putim sampela tok i kam insait long tok pisin. Em hia sampela: surik, raus, maski, beten, tais.

Olgeta yia planti boi i go i kam na i bringim dispela nupela tok pisin i kam long ples bilong ol. Bihain liklik olgeta ples i gat wanpela lain pinistaim boi i save gut long tok pi-

sin. Olsem tasol tok pisin i go kamap kwiktaim moa long olgeta hap bilong ol ailan na nambis bilong bikples.

### I NO TOK WAITMAN

Yumi no ken lusim ting long wanpela samting long dispela stori bilong tok pisin. I no waitman na misin i bin bringim tok pisin i go long olgeta hap. Nogat. Ol wokboi yet i bin bringim i go. Misin i painim pinis na i kirap raitim buk long en bilong skulim ol pipel long rit na rait nambawan taim.



# Untangled

## New Guinea Pidgin

is designed to help you obtain a speaking and writing mastery of New Guinea Pidgin and will be particularly helpful to those who reluctantly undertake learning a foreign language. The presentation is simple and gradual and avoids technical terms.

For just \$2.00 you can be guided step by step to a mastery of New Guinea Pidgin.



**Untangled New Guinea Pidgin** is now available at the following book stores:

Christian Book Centre  
P. O. Box 222, MADANG

Mt. Hagen Christian Bookshop  
P. O. Box 78, MT. HAGEN

Wewak Christian Bookshop  
P. O. Box 169, WEWAK

Christian Book Centre  
P. O. Box 718, LAE

New Guinea Book Depot  
P. O. Box 5495, BOROKO

Menduli Book Depot  
United Church, MENDI


Sunosi Buk Stua  
P. O. Box 215, KUNDIAWA

The Book Depot  
P. O. Box 90, RABAU

KRISTEN PRES  
MADANG  
PAPUA NEW GUINEA



Also available from other stores throughout Papua New Guinea.



**DOKTA REUBEN TAUREKA**, minista bilong helt, i tok welkam long ol deliget i kam long 7-pela kantri bilong wara Pasifik. Ol i stap inap 4-pela wik long wanpela trening kos.

Man i sindaun lukluk em i Dokta Ezequiel Paz bilong Filipin Ailan.

Wanpela han bilong Yunaitet Nesens, em ol i kolim Wol Helt Ogenaisesen, i bosim kos.

Ol man hia i laik painimaut olsem wanem ol i ken mekim gutpela wok dokta na wok helt na i no ken kostim pianti mani.

**ATING YU SAVE....**long 18 inap 21 Septemba bai i gat wanpela bikpela kibung tru bilong ol saveman bilong tok pisin long yunivesiti bilong Papua Nu Gini long Port Moresby.

Wanpela bikpela askim em hia:yunivesiti i ken mekim wanem samting na helpim wok bilong tok pisin.

**ATING YU SAVE**

Long Lae tokman bilong 5-pela lotu i orait long wokim wanpela program bilong skulim ol sumatin inap 4-pela yia olgeta long tok pisin na i no long tok Inglis.

Ol Luteran na Katolik na Yunaitet Sios na Englikan na Evanselikal Elaians i insait long dispela kibung.

Ol i tok planti yangpela boi na meri long ples i no inap go long skul olgeta sapos i no gat ol dispela kain skul long tok pisin na tok ples.

Tude i gat samting olsem 40,000 sumatin i save skul long tok pisin tasol.

Dispela pasin em i bilong helpim sindaun bilong ol man i stap yet long ples.

Ol tokman hia i orait long gavman i ken kisim olkain buk ol sios i bin raitim pinis long tok pisin. Ol i bin go het longtaim bipo yet.

**ATING YU SAVE**

Taim Mista Chan i bin tok long statim ol nupela beng, bilong Papua

Nu Gini stret, em i bin mekim dispela tok: "Beng em i no ples bilong mekim mani i kamap nating. Em i no wok bembe. Beng i gat wok long putim gut na lukautim mani bilong yu; em i no save givim mani nating."

**ATING YU SAVE**

Mista John Poe, minista bilong tret na indastri, i strong long rausim ol buk nogut i gat planti poto i gat sem i stap long ol sampela bukstua long Lae na Port Moresby. I gat tambu long soim na salim kain buk olsem long wanem i save bagarapim ol tingting bilong ol man.

**ATING YU SAVE**

Mista Michael Somare i bin tok amamas long ol lida bilong ol Tolai na ol Hailans i sindaun kibung wantaim bilong pinisim ol pait na tok kros i bin kamap namel long ol pipel bilong ol long Kokopo long sampe-la wik i go pas pinis.

Nau ol i mekim dai olgeta tok na ol pipel i sindaun gut gen.

**ATING YU SAVE**

Mista Ebia Olewale i bin tokim ol sumatin bilong ol ailan haiskul olsem: "Yupela i no ken wetim ol samting i mas kamap nating long han bilong gavman. Nogat. Yupela yet i mas taitim bun na helpim wantaim. Bihain bai yupela i lida; olsem nau yet yupela mas go pas soim rot."

Mipela inap wokim

Autim laik bilong yu tasol

- olkain sia**
- olkain tebol**
- olkain basket**
- blain pangal**


Mipela ken salim long sip o balus. Rait tasol i go long:

**CANE INDUSTRY  
PES-AITAPE, W.S.D.**

Bisnis bilong ol lokal pipel stret

**OLKAIN  
SAMTING  
LONG  
KANDA**

lukim ol prais hia





# AIR NIUGINI

AIR NIUGINI em i nem bilong nupela lain balus bai i senisim olgeta balus bilong TAA na Ansett long Papua Nu Gini. Em bai lain balus bilong gavman bilong yumi stret.

Long raithan yumi lukim poto bilong 3-pela i tren nau bilong kamap pailot o man bilong draivim balus. Nem bilong ol (kirap long lephan) em hia: Iamo Ralai, Leo Glaglas, na Kapi Sarohafa.

Bosman bilong dispela nupela lain balus em i Mista Ralph Conley, bipo i hetman bilong TAA long Papua Nu Gini.

Bai em i bungim wok bilong tupela lain Ansett na TAA wantaim. Na bai ol i kisim ol pailot bilong tupela wantaim.

Nau long Haus Asembli ol i toktok long givim orait long go het bilong dispela ealain long namba 1 de bilong Novemba.

Nau bai ol smolpela ealain tu i gat moa wok long ol liklik ples ol i ken go wantaim smolpela balus na kam planti taim.

Liklik taim bai ol misis bilong balus tu ol i lokal meri tasol. Planti i wok pinis long TAA na Ansett.

Mista Conley i tok em bai gat 30 balus long dispela nupela ealain. Na bai samting olsem 1600 manmeri i wok wantaim em long dispela nupela kampani.

Long Papua Nu Gini i gat 9-pela liklik lain balus. Em hia: TAL, Macair, Crowley Aerial Tours, Patair, Sepik Air, Patair, Bougainville Air, Airfast Helikopta.

I gat ol balus tu bilong Luteran misin, na Katolik, na SDA, na MAF.

I gat 23 kain kain kampani bilong karim ol pasindia na kago.

Quantas na Ansett na TAA bai bungim Port Moresby wantaim Australia na Hongkong na Singapore. Pacific Air i ran yet i go long Fiji. Merpati i kam long Irian.

Long Papua Nu Gini i gat 497 ples balus.



## Mipela helpim kantri asde tude tumora

*Ol balus bilong mipela i save flai moa long 200 taim long wik.*

*Mipela i gat sampela pailot i bin draivim balus inap 18,000 aua.*

*Mipela save flai i go long 40 ples balus insait long olgeta hap bilong Papua Nu Gini.*

*Olsem tasol, mipela i pilim mipela i save moa long flai long Papua Nu Gini.*

*Na wanem, em i ples tru bilong mipela Ansett.*




Serving the country-yesterday, today & tomorrow



**ANSETT AIRLINES OF PAPUA NEW GUINEA**  
in conjunction with ANSETT AIRLINES OF AUSTRALIA

AP112




**Mr Paul Kipo**  
Vice-Chairman



**Mr Christopher Talie**  
Chairman



**Mrs Sue Harlow**  
Research Officer



**Mr Sebulon Kulu**  
Executive Officer



**Mr Raga Maro**

**STADI GRUP BILONG  
NESENEL YUT MUVMEN**

Tenpela memba bilong STADI GRUP BILONG NESENEL YUT MUVMEN i bin go raun long olgeta hap bilong kantri bilong painimaut tingting bilong ol pipel long kirapimnesenel yut sevis. Yut sevis em i min


bungim olgeta yangpela man i no gat wok na putim ol insait long samting olsem wanpela ami. Tasol dispela em i no ami bilong pait; em i ami bilong wok, olsem ol i gat long sampela arapela kantri.

Dispela komiti o stadi grup i wok isi isi na inap nau ol i no bin givimaut sampela nius bilong wok bilong ol. Em hia sampela askim bilong ol: ...ol boi i mas gat hamas krismas bilong stap


insait long yut sevis? ...ol meri tu i ken insait long en? ...ol man i laik insait i mas winim hamas skul? ...husat i no ken kam insait? ...ol i mas insait o ol i kam long laik bilong

ol yet? ...sevis hia i mas samting olsem ami o nogat? ...bai ol i mekim wanem kain wok? ...husat bai bosim dispela wok? ...bai ol man insait long dispela trening i


kisim skul tu? Wanem kain skul? ...bai dispela sevis i stat long wanem taim? ...i mas gat hamas mani bilong ranim dispela kain sevis? ...ol haus, skul, kem samting i stap pinis?




**Capt. Gago Mamae**




**Insp. Onamaisa Mesa**



**Mr Vaita Navuru**




**Mr Pat Ila'ava**



**Mr John Haugie**

# KA KILIM MEMBA



Mista Atiheme Kimi

Mista Atiheme Kimi, memba bilong Haus Asembli bilong Henganofi klostu long Goroka i bin dai long namba 4 de bilong Ogas bihain long wanpela trak i krungutim em.

Em i painim birua long ples Kompri klostu long Kainantu taim wanpela trak i ran insait long lain manmeri i wok long singsing. Faipela moa pipel i dai na 8-pela i stap long haus

sik bilong Goroka.

Draiva bilong trak i stap nau wetim kot long Goroka.

Ol i bin planim Mista Kimi long Ababe viles na samting olsem 2000 pipel wantaim ol bikpela man i bin stap na sori na tok amamas.

Mista Barry Holloway, spika bilong Haus Asembli wantaim Distrik Komisina bilong Goroka, Mista Jim Sinclair, tupela i tok amamas long Mista Kimi tu.

Namba wan minista, Mista Somare, na namba wan gavman, Mista Johnson, tupela i bin salim plaua bilas bilong matmat bilong Mista Kimi.

Nau bai i gat nupela ileksen long Henganofi Open Iektoret. Long 24 Ogas inap 14 Septemba ol man i ken putim nem bilong sanap long ileksen. Bai ol man i vot long 27 Oktoba.



MISTA KILIMBU KORUS i gat tupela stua bilong redim olkain samis kaikai long Lae na wok bisnis bilong em i ran gutpela moa. Em i kolim tupela stua hia: Powi Yeh.

Mista Korus em i gat 22 krismas na em i bilong Wau. Em i statim namba wan liklik stua bilong em long Ogas 1972. Em i kisim dinau inap \$585 long Developmen Beng. Na dipatmen bilong bisnis developmen i bin helpim em tu.

Long mun i go pinis em i baim nupela stua gen long \$667. Em i gat tripela wokman na long wanpela wanpela yia inap \$25,000 i go i kam long han bilong em.


Tupela liklik stua kaikai hia i salim olkain samis na mit pai na sosis na loliwara...ol liklik samting bilong kaikai tasol.

## SMATPELA BISNISMAN



Mista Reg Stafford, hetman bilong Brownbuilt Kampani long Australia, i putim medal long saket bilong Mista Stephen Maino long wanem em i skul pinis inap long 6-pela wik long ol pasin bilong penim ol sia na srang na tebol samting bilong ol ofis. Pasin hia bilong pen, ol i winim pen i go karamapim samting ol i laik penim. Pasin hia ol i kolim spre.

Brownbuilt i gat bikpela bakstua long Moresby bilong olkain tebol samting bilong ol ofis.



bilong  
strongim  
bun

bilong ol  
liklik  
pikinini

swit moa olsem loli

# Nupela Bris Helpim Papua

Minista bilong ol wok Mista Thomas Kavali i bin opim nupela bris long Aroa Riva long hap bilong Papua.

Bris hia i stap 64 mail longwe long Port Moresby siti.

Mista Thomas Kavali i tok, dispela bris i kostim \$125,000 dola na em i namba 4 bikpela bris, Komonwel Dipatmen bilong ol Wok Haiwe.

Dispela bris long Aroa Riva, ol i bin wok-im long ain na simen.

Bris hia inap long karim hevipela samting inap long 32 tan tasol.

Wok bilong dispela bris hia ol i bin stat long mun Mas long yia i go pinis na i pinis long dispela yia, long mun Jun.

Planti moa mani bilong wokim olgeta nupela wok long rot, ol i bin kisim dinau long Asian Developmen Beng.

Mista Kavali i tok, gavman i hop bai i mas i gat gutpela rot i kamap long hap bilong Bereina long pinis bilong dispela yia.

Gavman i no lusim tingting, nogat. Koalisen Gavman i traim moa strong long helpim ol wok na pipel long go het bilong kantri.


Em i tok tu olsem, Gavman i makim pinis program bilong mekim go het ol hap ausait long taun o rural eria.

Em i tok tu olsem gavman tu i bin givim \$44,000.00 dola long wokim nambis rot i go long Delena na go long Aropokeina. Longpela bilong rot inap long 44 mail.

Bihain long olgeta toktok bilong Mista Kavali. Ol pipel bilong Mekeo long hap bilong Papua i mekim bikpela singsing tumbuna bilong amamas long nupela bris.



Bris hia inap 250 fit longpela, long Aroa Riva long hap bilong Hiritano Haiwe long Papua.



Minista bilong ol wok, Mista Thomas Kavali i katim tep, na i opim bris ain long Aroa Riva.



Mista Ron Slaughter i amamas, long wanem Mista Jim Ou Ou i draiv nambawan taim antap long bris.

## YU SAVE TINGTING

- .... LONG OL PIPEL ?
- .... LONG KANTRI ???
- .... LONG LAIP ?????
- .... LONG GOD ??????

Orait, yu ting long joinim lain bilong ol Brata bilong Sen Jon ov God.

Wok bilong ol em i bilong helpim ol man i gat olkain sik.

Ol Brata bilong Sen Jon ov God i stap 2 yia pinis long Port Moresby. Ol i ranim wanpela haus sik bilong ol pikinini i aipas, i yaupas o i han lek nogut. Ol i save helpim ol yangpela boi i gat trabel wantaim kot. Ol i save helpim sindaun bilong ol man-meri i rabis tru.

Sapos yu Katolik man na yu winim fom 2 na yu laik helpim pipel bilong yu na givim laip bilong yu long God, orait yu katim dispela tiket daun-bilo na salim i kam.

\*\*\*\*\*

Plis salim tok save bilong ol Brata bilong Sen Jon ov God i kam long mi:

NEM: .....

ADRES: .....

\*\*\*\*\*

Salim i kam long:

BROTHER SUPERIOR  
P.O. BOX 1306  
BOROKO, PAPUA

# KEREVAT PIPEL GLASIM PIKININI BILONG DIWAI PEPA



Ol studen bilong Vunadidir Lokal Gavman Staf Koles i stap insait long plantesin bilong olkain diwai pepa. Ol i laik glasim gut ol dispela diwai pepa. Ol studen bai i bungim ol pikinini bilong diwai pepa na bai ol karim i go na mekim

wanpela kain so long soim ol viles pipel. Olsem bai ol viles pipel i ken save long pasin bilong planim diwai pepa na lukautim na salim ol pikinini bilong diwai pepa long kisim mani. Pikinini bilong diwai pepa i save pait moa olsem kavavar.

Olgeta man meri long viles long Kerevat i bung long lukim ol dispela pikinini bilong diwai pepa.

Dispela so hia i kamap long Kerevat Didiman Stesin.

Ol studen yet i ken soim ol viles pipel long olgeta pasin bilong diwai pepa.

Pikinini bilong diwai pepa i gutpela long miksim wantaim olkain kaikai. Em i olsem sapos yu laik kaikai bilong yu i pait liklik long maus bilong yu orait, yu ken putim liklik pepa long en.



Dispela diwai pepa ol pipel long Hailans tu i save planim na lukautim na mekim gutpela bisnis long dispela na kisim mani long en.

## Nau yu ken kisim tok i kam long olgeta hap bilong graun


Ating yu laik harim tok i kam long Englan.....  
o yu laik harim musik i kam long Yurop .....  
o kisim Sydney o Melbourne o Canberra.....  
o yu laik kisim olgeta stesin bilong Papua Nu Gini.....

**ORAIT, YU BAIM DISPELA REDIO NA YU WIN.**

**R 358 B**  
Deluxe Portable (3 Band MW/SW1/SW2)  
12 Transistor 4 - Diode  
2 Speakers with big output  
Easy to read "Magic Meter"



**R 247JB/HB**  
A/c/Battery operation 2 Band MW/SW  
8 Transistor in Leatherette Cabinet



**RF 399**  
Tuned RF Stage, 12 Transistors  
3 Band (MW/SW1/SW2)  
Signal strength meter  
fine tuning.



**BURNS PHILP (New Guinea) LTD**  
i save salim na fiksim

**NATIONAL**  
PORTABLE RADIOS



O SUSA, BILUM BILONG MI I HEVI MOA, NA HET I PEN MOA MOA YET...



MASKI... YU KAIKAI TUPELA LIKLIK ASPRO TABLET WANTAIM WARA PASTAIM...



OLSEM... HET BILONG YU I KLIA NAU, NA YU NO PILIM BILUM TU...

**Nambawan marasin bilong olgeta pen**

MICROFINED FOR RAPID ABSORPTION  
CONTENTS: 25 TABLETS

**'ASPRO'**

FOR HEADACHE, PAIN, COLD & FLU SYMPTOMS



**The Constitutional Planning Committee  
THE JUDICIAL SYSTEM IN  
PAPUA NEW GUINEA**

The Constitutional Planning Committee seeks the views of all people vitally interested in this country's future, on important questions about how justice will be administered after self-government.

Should judges and full time magistrates continue to be independent of the government and have their positions protected by our Constitution? How should they be appointed? Should the House of Assembly approve the appointment of judges?

Who should have responsibility for major prosecutions — a Public Prosecutor whose position is safeguarded by the Constitution? If so, how independent of the Government should he be?

Should the position of Public Solicitor be protected by the Constitution?

To assist you, copies of the Committee's Discussion Paper No. 4 — "THE COURTS AND LAW OFFICERS", may be obtained from all District and Sub-District Offices.

Written submissions should be addressed to:

**THE EXECUTIVE OFFICER,  
CONSTITUTIONAL PLANNING COMMITTEE,  
PO BOX 6605,  
BOROKO (TELEPHONE PM 57565).**

**Konstitusenei Plening Komiti  
OL KOT, OL JUS NA MAGISTRET, NA  
OL LOIA BILONG KOT I STAP LONG  
PAPUA NIUGINI**

Olgeta pipel i gat bikpela tingting long ol gutpela rot long lukautim na ranim dispela kantri bihain. Na olsem long dispela taim Konstitusenei Plening Komiti i raun long painimaut laik na tingting bilong olgeta pipel long dispela samting, nau moa long rot bilong lukautim Justis (olsem ol Kot, ol Jus na Magistret, na ol Loia bilong Kot) bihain long Selp-Gavman.

Sampela askim bilong Konstitusenei Plening Komiti long dispela samting i olsem:

Bai ol Jus na ol Magistret i independen long Gavman, na bai Konstitusenei i lukautim namba na wok bilong ol? Taim ol i laik makim sampela man long kamap Jus na Magistret, husat bai i makim ol? Taim ol i makim sampela man long kamap Jus na Magistret, bai Haus ov Assemblies i mas orait pastaim long dispela man ol i laik makim?

Husat bai i kirapim ol bikpela Kot? Pablik Prosekuta? Sapos olsem, bai Konstitusenei i lukautim namba na wok bilong en? Sapos olsem, bai Pablik Prosekuta i independen long Gavman?

Bai Konstitusenei i lukautim namba na wok bilong Pablik Solisita?

Long alivim yu long bekim ol dispela askim go long Distrik o Sab Distrik Opis bilong yu nau askim ol long givim yu wanpela liklik buk Komiti i wokim. Dispela buk ol i kolim "OL KOT NA OL LOIA". Dispela em a namba 4 buk Komiti i bin wokim.

Sapos yu laik raitim pas salim i kam long:

**EKSEKUTIV OPISA,  
KONSTITUSENEL PLENING KOMITI,  
PO BOX 6605,  
BOROKO. (TELEPHON PM 57565).**

**Konstitusenei Palani Orea  
KOTA BONA TARAVATU  
GAUKARALAI TAUDIA  
PAPUA NEW GUINEA LALONAI**

Konstitusenei Palani Orea be ia ura diba taunimanima ibounal ena laloe be dahaka kota bona taravatu gaukaralala taudia ena hereva dekenal bona edena bamona idia gaukara Papua New Guinea sibona naria gaukara ia abia neganal. Jaji bona majestret be idia gaukara noho sibodia hari hegeregere bona gavamani ese ia hamaorodia lasi dahaka do idia karala o gwaurala bema kota ena gaukara idia karala neganal. Idia edia lagi danu gavamani ese do ia naridia? Idia be edena bamona do idia abidiahidi? Haus ov Asemblies ese jaji edia abiahidi do ia hamomokania?

Dalka ese kerere badadia do ia naridia? Pablik Prosekiuta ena lagi be Konstitusenei ese do ia naria? Bema inal bamona ia vara neganal, Pablik Prosekiuta be do sibona laloe karala ena gaukara lalonai bona gavamani ese do ia hereva henia lasi bema gavamani ena laloe ia abiadae lasi neganal?

Pablik Solisita ena lagi be Konstitusenei ese do ia naria? Ai ura durua umui dainai inal pepa inhanina ai boiboi "KOTA GAUKARA DALA BONA TARAVATU GAUKARA TAUDIA", be ia atoa Distrik bona Sabdistrik Ofesi ibounal dekenal. Mani umui lao inal pepa ta umui abia inal gabudia dekenal bona umui duahia.

Umui emui laloe be umui torea pepa dekenal vadaeni umui slala lao:


**EKSEKUTIV OFESA,  
KONSTITUSENEL PALANI OREA,  
PO BOX 6605,  
BOROKO. (TELEPHON PM 57565).**



Mr. Michael Somare  
Ex Officio Chairman




Dr. John Guise




Mr. Paulus Arek



Mr. Sinake Giregire




Mr. Paul Langro




Mr. Pika Kasau




Mr. Angmai Bilas




Mr. Tony Ila




Mr. Mackenzie Daugi




Fr. John Momis  
Deputy Chairman




Mr. Tei Abai




Mr. John Kaputin



Mr. Matiabe Yuwi



Mr. Stanis Toliman



Mr. John Kaupa

# NAU TASOL TRIPELA MAN FLAI NABAUT ANTAP



Nau tasol taim yumi tripela bikpela rum. Ol sindaun ritim dispela stori, tripela man bilong Amerika i flai antap long ol klaut na ol i raunim dispela graun bilong yumi olgeta 93 minit. Ol i stap insait long wanpela haus i gat

tu inap kam ausait na wokabaut antap long win olsem ol pisin.

Poto long lephan i soim 3-pela man i stap long namba wan tim i bin stap antap inap 28 de olgeta. Nem bilong

ol: Charles Conrad, Paul Weitz, na Joseph Kerwin.

Tripela man i wokabaut antap nau em hia: Alan Bean, Owen Garriott na Jack Lousma.


Long raithan antap yumi lukim roket i save sutim ol man i go antap

moa yet, bai yumi no inap lukim balus bilong ol. Ol i stap insait long rum antap tru long hap i gat mas antap.

Tripela man i bin go antap long 8 Ogas na bai tripela i kam daun bek long 4 Oktoba. Ol i flai 270 mail o 435 km. antap long graun. Ol i gat 270 kain wok long mekim long dispela taim na ol saveman bilong 21 kantri i wetim olkain nupela save bai ol i bringim i kam bek.

Taim ol i flai nabaut ol inap toktok wantaim 11 redio stesin long graun; wanpela em i long Australia.

Sapos em i gutpela taim, yumi inap long lukim haus bilong ol i flai long skai, taim san i laik kamap o em i go daun pinis.



## YANGPELA MAN, HARIM

Bihainim ol man hia long helpim wok bilong God.

*I gat tupela kain memba:*

- a.) Brata tru
- b.) Asisten Brata

*Sapos yu laik save moa long dispela kain laip yu rait i go long :*  
**PATER LIEBERT**  
**KATOLIK MISIN**  
**WEWAK**



# NESENEL DE LONG MADANG TAUN LONG YIA I GO PINIS

**OL I WINIM MANI:**  
 Kopa Goma/P.Moresby  
 Angela Kasup/Goroka  
 Theresia Dira/Yampu  
 Alphonse K.M./Bogia  
 William T./Angoram.  
 ( Lukim las pes )

*Mipela i tenkyu long  
 New Guinea Lutheran ol  
 i salim dispela ol potu  
 i kam long mipela.  
 Nating em i givim ai-  
 dia long arapela taun.*









## Kukukuku Kaunsi

Ol man bilong bikbus tru, ol Kukukuku bilong hap bilong Wonenara namel long Goroka na Mosbi, ol i gat kaunsi bilong ol stret long ples Marawaka. Nem bilong em yet Yelia Lokal Gavman Kaunsi.

Haus kaunsi bilong ol i bus haus yet. Tasol bipo long 22 yia ol i bin lukim kiap namba wan taim, taim ol i wel tru yet. Inap nau ol i gat biknem bilong paitman tru.

## Yusim \$500 Dola

Mumeng Lokal Gavman Kaunsi long Morobe Distrik, i yusim \$500 dola long mekim tripela wok long hap bilong em. Em hia ol tripela wok hia.....  
 1) Kaunsi i yusim \$200 dola long baim ol yunifom bilong ol 33 kaunsi.....  
 2) Kaunsi i yusim \$200 dola gen long wokim niuspepa bilong ol.  
 3) Arapela \$100 dola kaunsi i givim long ol pipel paia i kukim gaden kaikai bilong ol.


## Wokim Nupela Bris

Wanpela kampani ol i kolim Morris Construction Pty. Ltd., i bin kisim kontrak pinis wantaim Markham Lokal Gavman Kaunsi long wokim wanpela bris.

Bris hia i stap klostu long Yati long Kaipit Sab Distrik, insait long Morobe Distrik.

Kontrak hia bai kostim Markham Kaunsi samting olsem \$3,495 (3 tausen, 4 handet na 95 dola), i go long dispela kampani long wokim dispela bris bilong ol.

Dispela em i wanpela bikpela bris tru. Longpela bilong dispela bris em i 90 fit, na op bilong em i samting olsem 10 fit olgeta.




Dispela poto hia i stap antap long dispela pes i soim man i makim Papua Nu Gini insait long gavman bilong Australia, Mista Bill Morrison. Ol i bin potoim Mista Morrison long taim em i go opim nupela haus kaunsi bilong Wabag, insait long nupela Enga Distrik. Nau tasol Mista Morrison i pinisim wanpela wik lukluk raun bilong em insait long Westen na Sauten Hailans Distrik.

.....  
 Long arapela sait yu ken lukim planti man meri na pikinini tru ol i sanap na wetim long bungim Mista Morrison taim em i go opim dispela nupela haus kaunsi long Wabag. Em i bin toktok wantaim planti ol bikpela man long dispela taim yet tu.

Em hia wanpela bikpela tok Mista Morrison i bin tokautim o tokim ol pipel long dispela taim bilong Selp Gavman:

I no gat wanpela nupela senis bai i kamap long Papua Nu Gini long namba 1 de bilong mun Desemba long dispela yia. Nogat tru. Olgeta samting bai stap stret.



## 'READ'

**THE LITERACY AND LITERATURE MAGAZINE**

- Published Quarterly
- Subscription \$1 yearly

The Editor, Box 43,  
P.O., Ukarumpa, E.H.D.

# PASIN BILONG BAIM WANTOK

Sapos yu stap long skul o long kaunsi o long wanpela klap, mobeta yupela kisim planti WANTOK i kam olgeta taim. Sapos yupela kisim 10-pela o moa, bai prais i daun tru. Yu rait na askim mipela tasol.

Hia nau yu raitim :

Nem: .....

Adres : .....

Mi laikim ..... pepa i kam olgeta taim

Salim i kam long :

WANTOK - P.O. BOX 396 - WEWAK

Sapos yu wanpela yu laik kisim WANTOK i kam long yu stret, orait yu salim dispela tiket i kam:

Mi laik kisim WANTOK niuspepa inap wan yia olgeta. Nau mi salim \$4 (foa dola) i kam;

Nem: .....

Adres: .....


Salim i kam long :

WANTOK - P.O. BOX 396 - WEWAK

# Nambawan marasin

DEC 18 73 00378

# bilong olgeta pen.



## WINIM MAN!

Nupela samting .... Kampani bilong ASPRO - em marasin yu ken lukim antap hia - em i givim \$5.00 dola bilong dispela resis.

.....

Lukim ol hap poto i stap nabaut insait long banis long lephan. Bungim ol stret na mak bilong Nesene De bilong dispela yia bai kamap. Yu ken painim long nara-pela pes bilong WANTOK niuspepa.

.....

Bungim pinis, nau pasim ol long glu na salim piksa i kam bek long mipela. Bai 5-pela man inap winim wan dola, wan dola.

Salim i kam long: WANTOK PIKSA

BOX 396, WEWAK

# Wantok

Digitized version made available by



**Copyright:** Under copyright

**Rights Holder:** Word Publishing Company Limited

**Use:** This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

**Constraints:** This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

**Note on digitized version:** Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.